

欽
定
全
唐
文

欽定全唐文卷八百三十二

錢珣二

授前左武衛將軍李儔左領軍衛大將軍前右監
門衛大將軍江繼美左領軍衛大將軍制

勅具官李儔等王者之居率先警衛將軍之令必勝戒嚴
儔與繼美皆以絳服青綬常立於西序矣在列甚謹其勤
亦多戎容頗稱於抱材家食且聞其處困故以左右領軍
之命並而進之兼罷秩已來爲日斯久咸從遷陟用舉滯
淹可

金定全唐文 卷之三十一
授前威勇軍節度都指揮使楊承襲左千牛衛大將軍制

勅拊琴瑟者其聲不諧尚或改而張之況軍旅大事利害可論姑務變通且期寧謐具官楊承襲素以材力聞於朝廷昔屬興師乃思致勇而時惟黷武未足經邦每念殘人遂能屈已旣從休息何必訓齊爾其罷彼戎機來歸環衛職親任重假寵甚多無懷逆命之謀宜奉徵還之召況參宿衛亦在促裝可

授牟崇厚右千牛大將軍等制

勅具官牟崇厚等罷行部者入則率執刀之屬以居其官
去宿衛者出則賞賣劍之人以成其政中外迭用典故甚
明崇厚嘗分吾憂知其理之急善有聞也漢蕃能闕爾職
戒有備之嚴勤可稱也家食皆久賦祿甚宜勿墮勿媮以
期無咎可

授前驍衛大將軍劉崇文左羽林大將軍知軍事
等制

勅具官劉崇文等漢家總率禁軍有南軍北軍之號今羽
林領軍之職蓋近之矣崇文廷美常以赳赳之材對濟濟

之列稱夫環衛立在西階今復命之俾無遺者勉揚威烈
勿怠警巡桂林屬城頗參戎俗以若納久當官次多達物
情分我遠憂資其惠政入居出守各慎所爲懸法甚明賞
善斯至可

授王知遠左衛將軍制

勅具官王知遠堯之克明周有懿德推恩而舉其有遺於
親戚者乎如得其才匪曰私舉知遠稟訓於父且勵事君
在官不違設爵何恡將軍使爾備宿衛尚書使爾進秋官
且示兼榮則宜竭力報吾推恩之道無所私於親戚也可

授陳班右金吾衛將軍制

勅具官陳班朕求理未濟厥心匪寧實在庶位之間皆欲
必獲其所況爾克繼勲籍通知武韜許國之誠忘身靡憚
受爵而每期無忝檢身而唯恐有瑕雖秉郡符莫食公廩
退居而處沈靜可嘉陟以執金仍兼端右俾承閥閱且耀
寵章可依前件

授高彥宏右金吾衛將軍制

勅具官高彥宏朕每視朝執金吾率其仗衛陳於陛前退
則與大京兆禁暴詰姦以清轂下其職如是非細任也以

爾進在周行常爲環尹實於巡警素積勤勞比授郡符將觀爲政屬在節制有所薦聞方資宣力之臣難奪舉材之請未能出守遂至罷居暫解印於外臺復彈冠於近列勉思有寵善戒不虞可依前件

授楊約左驍衛將軍并焦敬復左領軍衛將軍制勅國家之道文武相須故帶綬簪冠而處將軍之位者必求雄俊之材以對我卿大夫具官楊約智則好謀勇而知禮臨戎之用以律甚明具官焦敬復莅事多能理煩益辦舉其成效可以在庭俾就環衛式昭獎勸使號令有嚴於

宿衛威名皆稱於職官副吾雄俊之求以濟相須之道可依前件

授前左威衛將軍安宏度右監門衛將軍制

勅具官安宏度等吾以大柄付丞相日行於堂上唯文武之士參用其才耳凡觀公舉亦必可之今具列爾名來請吾命將軍佐吏循次而遷且稱所能兼授貴秩罔有不信往宜思之可依前件

授郭師簡右衛制置使右羽林將軍制

勅環尹之設皆得以親宿衛時警巡而羽林之名自天垂

象有拱宸之貴擇人匪輕具官郭師簡頗負雄材仍懷勇氣堅秉事君之禮深知用武之權載感時艱因思已立禦寇而隄防甚謹提兵而號令必行善復流亡多謀完葺率先陳力誓不去於京師望幸傾心志有同於父老難能之節臨事始明方資制撫之勤遂假陟遷之寵宜乘激勸更集功庸猶懸受賞之期重在平戎之日可依前件

授前千牛衛將軍徐榮右神武將軍兼知軍事等

制

勅具官徐榮等陳力諸吏曳長組於西階之下而參將軍

之位者況假地官之秩兼騎省之名仕蓋顯矣惟榮暨岳
皆嘗立朝自効之勤所聞甚著使之遷擢乃用舊章道隣
有勞於公亦宜賦祿郡佐漸優之命勉進爾途可

授右千牛衛將軍李璠等右威衛將軍制

勅具官李璠等朕每據法座命百辟四夷大和會於朝能
率其屬建黃麾飛麟之旗立於陛前者有衛將軍之盛職
也璠以忠謹之職周旋於藩邸之中以久得遷常爲貳金
吾矣武弁有列乃命陟居儔以壯勇之材率陳扈蹕之力
以功可進來立於朝旣曉玉鈐俾登環衛尚書之秩光寵

並行可

授王存禮左威衛將軍制

勅具官王存禮等朕於文武之士雖用之有殊而覈之不
異以材濟用者是所求也以志立功者是所嘉也至於免
官去職寄食屏居言念艱難益多愧歎執政能舉我心允
同且以爾等負濟用之良材立守身之素志又復免官寄
食安得置而不圖各敬所遷以揚厥職可

授王牘太子賓客制

勅典職之重本於調護之名者非端厚自守練達有聞焉

可罷而復居當我爲官之選具官王牘始以剛方之氣嘗
矢志於策名受聘塞垣通籍朝序致強學之力不廢半途
恥巧宦之謀罔違公道利多開物優實在邦戒滅裂以能
勤知蒲盧之可化頃因將命遂乃去官爰陟崇階俾還舊
秩勉來辨色無墮盡忠可依前件

授前沂王傅賜紫殷盈孫可太子右庶子等制

勅具官某等習與性成至哉夏書之訓也故近則相習習
則相成國有儲君戒之在習於其附近實屬上僚盈孫學
本六經遂達四教出言行事常得指歸是以宮相命之且

欲近吾元良利於所習其爾必疑荷聞前爲博士官竟不就列堅求縣長務供養之資圖樂退居爾能干祿載典而興有所嘉焉可依前件

授左司郎中鄭凝吉京兆少尹前龍州刺史韋貽範右司郎中制

勅具官凝吉承執政之門知循法之道升在郎署不忘公家多稱抱材足以集事今京師尹正之大藩后兼之甚理矣貳茲善政期爾必能舉而任之無忘吾命貽範精明不匱宏博可觀嘗佐鉅賢愈修茂行敏求所至通籍必華遠

牧罷民朝皆思用都曹郎總率之職次管轄焉吾今舉典用人孰云匪重來居斯秩無効淺爲官或有聞何求不達可依前件

授前左司員外郎趙均長安縣令制

勅具官某慎行於家能養其親也慎言於朝能保其身也士大夫有是二者列於周行善用恬和且聞淹恤循於常典安可滯遷屬京縣寓理之難度材云急流亡未復賦斂猶虛以爾所慎之多必當克集其事錫茲銀印耀彼綵衣承寵而將慶問安思報而勉圖爲政可依前件

授前右補闕孫偓長水縣令賜緋制

勅具官某士大夫不能理其身而能理於人未之有也爾嘗以文行進取科名列在華資詎非素志一旦身退朝實多之所謂能理其身固可理於人矣加之朱綬用表積中寧無所操施爲善政可依前件

授李繼文隴州防禦使制

勅旁據汧陽橫當隴首地有提封之盛軍多帶甲之雄旣用良材宜膺正秩具官李繼文久從戎旅深達機謀忠信交修德刑並務御衆而推勞必報徇公而約法甚明元帥

上聞朝章可舉兼進祝鳩之命更揚建隼之威夫牧伯之
居憂寄實重使功名之充位在富貴而可圖已列諸侯勉
爲政事可依前件

授潁州刺史充本州防禦使王敬堯加檢校太子

太保制

勅書云若網在綱有條而不紊故國家化條施於天下者
牧伯謹而舉之政不紊矣具官王敬堯始學司馬法克礪
諸侯劒奮之以果敢之氣濟之以練達之謀自握郡符頗
圖成績

闕四
字

潁水則清年數且深理濟彌遠耕桑滿野不

奪農時卒乘在軍未忘武備遂得見稱元帥是當善舉化
條保民之崇增秩甚貴吾用漢家之典爾登循吏之名更
務克終斯爲守貴可依前件

授齊州刺史充武肅軍防禦使朱玘加檢校司空

制

勅歷下名地也司空貴秩也處名地而增貴秩者非夫稱
推擇洽物情焉得獨受寵章重宣王化具官朱玘當年思
立學武有經固忠順之根本以機權爲枝葉且能刺部兼
務睦隣酌寬猛以守常就變通而處衆爲善難掩不伐愈

彰見求福於自謀信唯人之可召乃行茂典用叶公言可依前件

授鹽州刺史李太直充本州防禦使制

勅有土之寄帶夫

一作虜

鄣者不其難乎鞠旅所以謹提防

揚威所以遏淫蕩試材既可正秩無疑具官李太直昔爾伯氏嘗居五原以墳簣相和之勞致邊境無虞之樂而天倫有戚戎律可歸乃自人情繼臨軍政勇則匪怒智必好謀知金湯不在乎城池而耳目不專於旗鼓勤於宣力別用壯心去假守之舊名當諸侯之高位更圖善最無恃寵

休勿使漢家獨稱魏尚可依前件

授李襄刺史等制

勅李襄等醫一郡之疾苦旣藉良能理四方之滯寃必資
明慎二者生人之本也深詔執事精其選求以爾襄瞳洎
荆或清識雅裁爲時雋才或檢操修身累居繩準所至必
畱其風範當官克勵於霜標而承休前理蜀川頗聞嘉績
是可以分我符竹光於省闈號畧巴梁地清俗富刑曹粉
署務劇望高往副分憂勉思伏念襄可號州刺史韋瞳崔
荆並可刑部員外郎承休可果州刺史

授傅德昭羅州刺史裴昶維州刺史趙贄崖州刺

史等制

勅具官傅德昭等建隼在旗畫熊當軾以物彰貴出守者
兼而得之故用武以來惟功是賞厚爲寵報多在勤勞以
德昭淬礪雄銑利若太阿之劍以昶展張勁力強於繁弱
之弓以贄馳騁茂駿比於渥洼之馬而皆藏勲有籍秉節
無尤旣當行賞之倫宜受分憂之命勉爲善政無病遠人
可依前件

授劉玉新州刺史劉潛南五州防遏使高州刺史

制

勅具官劉玉等傳曰夫舉無他唯善所在吾閱二帥臣舉知之狀善則可甄而天下諸侯咸當共獎王室有以忠而告我我必信而與之以玉勇望明堂用苞武庫訓士則專於齊一理人必去其煩苛嘗莅南康且畱遺愛以潛好謀不惑任智能通仍懷恤隱之心頗慕徇公之節因以牧養必致惠和是以復委詔條兼資禦遏或進寵移之秩或臨舊理之邦以玉之勇主於任以潛之智立於事則吾南極之地又何憂乎黎庶哉可依前件

授成希戡忠州王進誠嚴州刺史等制

勅具官成希戡等泝峽而上踰嶺而出其人多處險而錯居處險難制錯居難齊非嘗試其才素習其俗未可爲其理也希戡以敏知變而不矜雄勇之材嘗試於忠人皆便之統帥上言乃命真守師長之秩諸侯所榮進誠自我入華久處遐徼之地習南方之俗思還其居勲帥舉之刻印而當吾委寄咸被寵光處險錯居各懋爲理可依前件

授保大軍節度掌書記檢校右散騎常侍房仁寶

檢校禮部尚書充職制

勅具官房仁寶等國朝作相之重在文皇帝時以偉德景
躅布於史策者有吾太尉馬爾仁寶裔孫始以文進不得
其志無所成名今用牋奏符檄之才職居藩服乘傳而至
善達戎機思賢之心欲招後嗣春官假秩儒者斯榮且激
爾曹勉佐元帥可依前件

授朔方軍節度掌書記檢校刑部員外郎兼侍御
史李東序檢校司勳郎中兼中丞充職制

勅具官李東序凡諸鎮陪臣至自其幕府者或計事言功
或舉職請命未嘗不召之便殿假以寬言且使鋪陳皆見

臧否爾能用儒術佐吾列藩敷揚可取於詳明條貫必由於忠信嘉善之道增秩所宜乘寵而還永觀爾類可依前件

授鳳翔節度掌書記范惟乂左拾遺賜緋充職制勅具官范惟乂等軍興以來四方之政益煩矣而負才抱術之士參於武幄者吾嘗授之好爵用表嘉賓復勉其左右聽從始終同獎爾負才甚直抱術且深自有忠謀共贊戎畧故加寵於紱冕之上報勞於師旅之間爾其計事出言必公必信更圖保大無或告勞可依前件

授竇回鳳翔節度副使崔澄觀察判官韓偓節度

掌書記等制

勅具官竇回等漢詔子弟理郡國必擇諸儒有材行者以
左右之故韓安國王尊之徒皆能守法相導炯然可觀而
顯位高名終亦自得今朕以汧岐奧壤而輔京師推擇統
臨重在藩邸用乃命丞相選賓介於朝而回以術業克官
丞相先緒澄以禮義端已實稟天成偓致用於文甚多強
力舉是三美濟於一方苟務同心必聞善政吾欲保任親
戚表率諸侯往贊理聲日當傾聽爾等亮直勤敬如在諫

省郎署時則安國王尊之賢與古相望遷秩命服誠未足
多可依前件

授保大軍節度判官鄭晦朝散大夫檢校工部尚
書觀察支使劉源長檢校刑部郎中節度推官
張道樞檢校祠部郎中觀察推官韓伎檢校工
部員外郎招討推官高頎檢校水部員外郎並
充職等制

勅具官鄭晦等吾廊時帥臣盛有忠力於王室其所以輔
成勲烈者蓋俎豆之設召置得人言善必行計奇必用而

爾等克荷代祿載揚家聲或端敏有爲學術自飾尊獎之志斯不忘於善言奇計之聞信有輔成之道爾故八座諸郎銀章朱紱加於幕府遂被薦聞更推共濟之誠茲亦未多之寵可依前件

授同州防禦判官崔洎充節度判官長春宮巡官
郭璘充掌書記防禦推官王丞雍充節度推官
等制

勅具官崔洎等朕以左輔雄近復加節制之權而帥臣舉彼賓寮分其授任且聞洎等各抱美材見善必遷存誠甚

直每竭用長之智以匡保大之謀郎署金章吾又何愛噫
論兵有畧爲政有經參佐不渝寵光自至可依前件

授前河中府少尹張處休加檢校郎中靜海軍節
度副使沈琮檢校員外郎充職裴綽澠池縣令
蔣玠臨晉縣令等制

勅具官張處休等夫以忠謀直道佐諸侯之善以又一方
而致其誠節卒歸王室者則陪臣得其職矣於慎獄勸農
便百姓之欲而利一邑則令長得其官矣爾等博達吏道
善事知己而處休以文學自進玠於勲緒有承閱拔嘉杼

遂可其奏皆用訓汝爾其圖之可依前件

授攝淮南觀察支使田光嗣檢校郎中充職李潛

嶺南西道觀察支使長蘆縣令房殷兼侍御史

等制

勅具官田光嗣等從事之任卒以策謀文翰往參諸政能則政舉否則政墮故有慘舒繫乎能否安得以一談一笑媚於所從維揚控淮海之會邕南雜夷獠之居各引良材往佐其理而光嗣潛殷之善必有以稱其授聘者咸來被寵無忝爾知可依前件

授楊知權袁州司馬陳錫溫州長史楊澄端州司

馬等制

勅具官某等凡臨戎有勇知其能爲將成務有材知其能爲吏然則有勇有材者置之不遷使其興旅食之歎非所以激爲將勸爲吏也各命敘升無忽吾典可依前件

授魏州別駕張景裕等四人正授制

勅具官某等任人其難古有試可之說爾等爲吏嘗試於魏中矣今藩臣信正其秩是必有試可之材皆命與之亦惟常典可依前件

授魏博節度副使守左司馬知府事長沙縣開國

子羅紹威檢校司徒進封開國侯制

勅王制之重列爵惟先開國之名徹侯斯貴具官某自河而北地闊兵賦之大實在鄴中而又以雄傑之材統臨有政爾以忠孝全道副貳其權嚴訓所資美譚甚遠不作威而人自畏能處順而事必行理戎每贊於公家秉禮無違於私室更廣疏封之寵以分勸善之章勿怠象賢是爲守貴可依前件

欽定全唐文卷八百三十三目錄

錢珣三

授高爽果州刺史安友晟寧州刺史仍封武威縣

開國子加食邑制

授金州刺史馮行襲檢校太子少保仍封長樂縣

開國子加食邑制

授寧州刺史高爽檢校司徒仍封渤海縣男加食

邑制

授張濬特進守右僕射依前充諸道租庸使制

授河東節度副使檢校司空王瓌特進制

授沁州刺史張漢瑜等特進封開國男食邑制

中書侍郎同中書門下平章事陸宸妻渤海郡夫

人高氏進封燕國夫人制

內中齊國夫人扶風高陽郡夫人並封婕妤樂安

郡新秦郡廣陵郡太邱郡雲安郡五夫人並加

封秦晉楚越燕國夫人制

魏博節度使羅宏信妻越國夫人某氏進封燕國

夫人代州刺史傅瑤妻邱氏封吳興縣君等制

荆西節度使錢鏐妻燕國夫人吳氏進封晉國夫人制

襄州節度使趙匡凝妻豫章郡君羅氏可進封燕國夫人制

武昌軍節度使杜洪妻晉國夫人進封秦國夫人制

鳳翔節度使李茂貞妻秦國夫人劉氏進封岐國夫人制

泰寧軍節度使葛從周母廣平郡太君宋氏進封

廣平郡太夫人制

翰林學士兵部侍郎盧說妻博陵郡君崔氏進封

博陵郡夫人制

泰寧軍節度使葛從周妻清河縣君張氏進封清

河郡君制

冊贈李茂莊太師文

冊贈劉崇望司空文

冊景王祕文

冊輝王祚文

冊祁王祺文

冊雅王禎文

冊瓊王祥文

冊淑妃爲皇后文

欽定全唐文卷八百三十三

錢珣三

授高爽果州刺史安友晟寧州刺史仍封武威縣

開國子加食邑制

勅我思致理不欲滯人復於賦祿之間常有失勞之慮改
張之道且就便宜勸善之章必先允當具官高爽周知武
經盛著臣節拳勇之力馳騁有成前以新平殄寇之勲移
北地頒條之政而茲之牧守且務輯綏元帥請畱我所難
奪南充善部皆曰可居雖改乘轅將聞叱馭具官安友晟

兄友弟恭共圖富貴披堅執銳惟徇國家當羣克効逆之
秋激受命忘身之氣比膺賞典亦剖郡符且未登車實同
解印或致杜門之歎是忘盟府之書乃寄邊城仍加列爵
爾其各宣美化如立前功必使忠臣兼攝循吏可依前件
授金州刺史馮行襲檢校太子少保仍封長樂縣

開國子加食邑制

勅漢制郡國有政者皆不易其居就增其秩欲使人安於
教化且激勵精本自彫刻皆成富庶具官馮行襲始用忠
謀勇力披難立功每推求敵之心必能禁暴爲武思齊良

將閭合善經而負山面江金實名部燎於兵火毒我編氓
爾則保之如家視之如子盡寬井賦恐奪農時耕無惰夫
廩有豐食地產修述職之貢市租給備患之師相里所而
同欲乃遷興役徒而施勞何怨炳然之績觀而可論保民
既重於三公開國仍昭於五等如能知勸當更陟明可依
前件

授寧州刺史高爽檢校司徒仍封渤海縣男加食
邑制

勅昔慶父去而魯難寧得臣死而晉憂弭事有所近之類

而人有可論之功則用典爲以勸來者具官高爽魁傑之材好通經畧強禦之力善據邊防激將帥之雄心憤邦家之多事聞吾出狩來扞近郊遂驅有律之師進討不然之黨壓卵旣潰衝寇始平忠烈可圖勲勞甚盛進階以數開國有章且觀得衆情無不悅於是賞勵之不已保則永休可依前件

授張濬特進守右僕射依前充諸道租庸使制

勅古者建官取諸垂象故左右執法附於文昌以總六卿以提庶政用人之本邦國繫焉進賢旣協於嚮公致理詎

宜於虛位具官張濬剛而能斷寬則有容保和而實孕元
精索隱而若陳洪範他山攻玉鮮類禹珪九牧貢金自成
周鼎先皇帝爰立作相朕小子圖任舊人每親夾輔之才
且致勤行之道必將率衆由已化兵爲農載胡越以同舟
混車書於外戶志所未就我實盡知經營向在於四方親
附未遺於百姓雖聚財之任不欲允煩大臣而復國所資
安可有稽征賦薦居端右兼陟崇階得名器之所歸在典
章而斯重永期宏濟更集前功可依前件

授河東節度副使檢校司空王瓌特進制

勅爲國之政在藩有條贊立武於中權屬好謨於副介具
官王瓌河汾之氣當萃爾家樂范之宗亦高他族伯仲繼
撫封之盛子孫承錫命之功爾能繼彼勲名主於忠信遠
取而寧規勇爵深思而但顧良弓列羣后之上卿處前人
之許國尊獎之道造次必論心或益恭諒蕃昌之可保性
能召福何富貴之不來朝舉寵章事歸敦勸方布冊勲之
澤俾崇馭貴之階善佐永圖以承厚渥可依前件

授沁州刺史張漢瑜等特進封開國男食邑制

勅具官張漢瑜等漢室勲勞始以進奉朝請而好爵之設

五等具焉至於任以專城秩參環衛假之有寵典亦匪輕
漢瑜以致勇之誠臨戎罔憚且能抱節而後立功則良將
之才挺然可見宗裕恥同兒戲學在師貞過庭有聞刺部
甚美則愛子之號昭然可知是以詔我代言俾茲申命亦
用垂勸期於徇公可依前件

中書侍郎同中書門下平章事陸宸妻渤海郡夫
人高氏進封燕國夫人制

勅命婦之寵數有四而國邑居其首主爵郎舉職勅請必
有舊章因以勸焉朕何敢愛具官陸宸妻渤海郡夫人高

氏高國族大稱於古者久矣冠冕就列尚想前修閨室有
婦令聞令望配君子而相敬承宗事以無違鏘然和鳴信
可偕老考祥之應已屬台臣守貴之謨方資內助主爵之
請誰云不宜他日中宮受朝則與伯婦俱至佩玉相顧爾
家盛哉非獨榮吾相之小君亦以勸天下從夫之道也可
依前件

內中齊國夫人扶風高陽郡夫人並封婕妤樂安
郡新秦郡廣陵郡太邱郡雲安郡五夫人並加
封秦晉楚越燕國夫人制

勅朕旣建中宮將聽內理法度方刑於四德等威宜越於
九嬪齊國夫人某氏等柔和有稟閑雅自持椒蘭讓薰環
珮爭潔近輦見欲辭之色攬衣懷必澣之心用是謙勤保
我恩澤重惟漢制遠采周官與名而大國重開錫號而舊
章復振勉修懿範俾稱寵休共承陰教之端永輔長秋之
盛可依前件

魏博節度使羅宏信妻越國夫人某氏進封燕國
夫人代州刺史傅瑤妻邱氏封吳興縣君等制
勅具官某妻越國夫人某氏等據地圖總兵籍處邦君之

金匱要略卷之二十三
王
位與夫持使節頒化條當牧守之任者理軍爲政皆執善
經而保寵之謨亦多內助女師稟訓夫族稱賢不違柔順
之規且習閑和之性或功庸克備風法有承或環珮之音
周旋可聽是宜增大名之國開初命之封亦所以榮外臣
而勉內助也可依前件

制西節度使錢鏐妻燕國夫人吳氏進封晉國夫
人制

勅齊之辟司徒武力之臣也其妻有禮尚獲錫地於君今
師長萬夫提封千里內資淑媛助我勲侯國建大名是惟

舊典具官錢鏐妻燕國夫人吳氏肅雍之美箴戒不忘聞
雞鳴而致敬事姑諷鵲巢而思齊有德輔成功烈諒屬柔
明爰舉寵章載加常等勉承膏澤以耀閨門可依前件

襄州節度使趙匡凝妻豫章郡君羅氏可進封燕

國夫人制

勅隨夫之爵考禮有文冊勲旣集於藩維流澤可榮於閨
室具官趙匡凝妻豫章郡羅氏肅雍有美柔順不違爰自
和鳴克融懿範旁濟中權之盛實資內助之勞致我良臣
表於諸夏眷言淑德疏封未稱於宜家越被舊章用典俾

光於開國勉修婦式無忽人倫可依前件

武昌軍節度使杜洪妻晉國夫人進封秦國夫人

制

勅經夫婦之本者莫近於詩故宜爾室家言稱也如鼓瑟琴言和也具官杜洪妻晉國夫人王氏贊洪守土宣力爰致顯爵爾以嘉耦之道遂能居而有之助彼藩條賴茲閨室宜室家而何媿鼓瑟琴以有聞仍命增封用旌柔順因吾肆赦是謂典常可依前件

鳳翔節度使李茂貞妻秦國夫人劉氏進封岐國

夫人制

勅封邑之制當列國者甚貴矣其或舉茲重典進受大名
俾增伉儷之光以稱侯王之爵宏之在我宜者則行具官
李茂貞妻秦國夫人劉氏能修懿範潛助元勲福雖盛而
心益忝封旣大而勤不匱內言必正同獎自多贊武幄之
忠謀保魚軒之寵數而茂貞宣力守土在岐以是加恩用
彰有禮必使事君之節相勉克終則不獨宜爾室家兼明
報國可依前件

泰寧軍節度使葛從周母廣平郡太君宋氏進封

廣平郡太夫人制

勅某官某母郡太君宋氏古者事親竭力而養樂於負米
信有其人今從周秩帶三公貴享千乘實賴嚴明之訓以
成忠信之名爾旣承顏必盡無違之志吾方敦孝遂加有
典之榮可依前件

翰林學士兵部侍郎盧說妻博陵郡君崔氏進封
博陵郡夫人制

勅爲人之婦能從其爵以益貴者是必宜其家矣而階品
在三等之設有銀印青綬之崇則從爵之名所增益貴具

官盧說妻博陵郡君崔氏族大多聞多聞者風法性成不易不易者柔和勉說代我之言必能恪居其職助於內者足以彰焉是謂宜家可當用典展衣之飾不其盛哉可依前件

泰寧軍節度使葛從周妻清河縣君張氏進封清
河郡君制

勅具官葛從周妻清河縣君張氏生自良家配吾戎帥頗能佑助克濟功名柔順睦親內則有聞於宗族溫恭近禮外言不出於閨房旣屬推恩是宜用典進之郡邑俾稱藩

侯可依前件

冊贈李茂莊太師文

維年月日某甲子皇帝若曰忠信之於人也並酒醴之有
麴蘖也智者厚而愚者薄能者寡而知者衆麴蘖厚而遺
味深忠信厚而遺美大存誠所至享福必全生死旣分是
非乃定咨爾故山南節度使開府儀同三司檢校太傅典
侍中興元尹李茂莊懷忠信之實圖闕行其不迷用則不
匱得之善始守之克終故金蟬左貂爲爾之冕昭其官也
彤弓旅矢爲爾之器昭其錫也而又帶綬係印曰公曰相

位列元帥政在中權馮翊分三輔之豪成紀接右界之險
俾爾出號令爾惟有威俾爾施教條爾惟有惠威則鮮犯
惠則鮮違吾復以漢中控諸蜀塞耀爾昆弟聯彼封疆易
武節以授之實地圖之巨者勒夫忠信是亦庶幾尚其爾
當職必修許盟必會更資共獎且勵率無疑使我擇臣心
得以示信萬國之川流靡息一朝之山立遽頽嗟復魂以
安歸悼降年之非永戎昭所賴天奪良多言念舊臣亦不
半在茲以悽惻何必鼓輦昔人能立武者則太公爲師慰
爾之行用示追顯是爲有卒無爲不瞑今遣某官某等持

節冊爾爲太師嗚呼爾其聞吾茲命

冊贈劉崇望司空文

維年月日某甲子皇帝若曰生不能用死而誅之爲上者
且愧於心古君子亦云非禮其或嘗居夾輔兼授中權生
也無不用之悲歿也有可追之命展茲異數示彼諸孤我
念大臣庶幾得禮咨爾故特進兵部尚書劉崇望氣質之
稟直枉自分先哲王於是而觀賢不肖於焉乃定所以樹
爲吉德彰在令終論若所爲信如斯語始於家事勵以躬
行處昆弟之歡恥聞優劣視僕隸之役常務寬容避名無

取乎白眉掩過每言乎爛手周愛疏屬徧惠故人位高而
惟恐驕矜權至而未嘗擊斷剛亦不茹怨乃用希是以誠
存則安族大能保天非有私於若惟若有順於天昔者太
史秉書沖人嗣訓時乃之任首冠侍臣罔漏代言以光誕
告機平旬歲勉應旁求佐理甚勤念功如在比從蜀道入
補夏卿方待嘉謀共熙庶績一旦奪我心膂剋爾膏肓夢
兩楹而遽罹明徵偃巨室而猶疑假寐永言辨色遂絕履
聲且臨將葬之期彌積或虧之痛自朝受策以法登車往
慰逝川俾稱空土今遣使左諫議大夫憲王博副使倉部

郎中溫緒持節冊爾爲司空於戲吾所申命何若於魯侯之誅屬辭於若尚知之哉

冊景王祕文

維年月日皇帝若曰周官八統其一親親漢制皇子爲王使得立社於國固本之大哲后皆然咨爾第八男祕當保抱之間有敏惠之性亦旣總角遂能勝衣默識天經潛資日就未嘗玩物可以疏封乃告守龜具聞叶吉來受茲典永爲東藩今遣某官某乙持節冊爾爲景王於戲見不賢而能思賢爾則必賢矣知可逸而能無逸爾則常逸矣是

宜廣洪緒永不休敬而聽之罔失厥度

冊輝王祚文

維年月日皇帝若曰古君子篤於其親者使天下皆興於仁也故二王五子之封非獨立愛而已咨爾第九男祚克岐之質見善欲遷稟訓道而必開故戲言而不受一隅已達四術可陳乃申胙土之章俾奉成人之禮今遣某官某乙持節冊爾爲輝王於戲爲臣爲子皆在爾躬有器有名敢私國典錫類則非孝不可遠恥則非恭不能無替聿修以光利建白茅金璽昭物具焉爾其夙夜循思用稱休命

冊祁王祺文

維年月日皇帝若曰廟立之重天序可承將茂本枝式遵
懸法庸就至公之體諒非吝子之心咨爾第十男祺稟性
惟和挺材亦秀飭躬罔念於紉素樂善欲忘於鼓鐘析壤
之休自天而啟臨軒之命秉禮則安今遣某官某乙持節
冊爾爲祁王於戲保在深宮鮮知正範任之作傳我必擇
人苟有如韋孟之諷諭安國之輔導者爾當俯聽其言勤
行其教使我自家之訓克彰於萬邦而固爾建社之寵不
其大哉

冊雅王禎文

維年月日皇帝若曰周家之嗣分茅土者十五國漢景之
代書簡冊者十三王朕以寡昧之資奉神靈之統每顧諸
子實惟天休期訓導之將成諒封建而可享咨爾第十一
男禎方當稚齒復在深宮有知憂知懼之心見學禮學詩
之性自然而稟最樂不渝遂詔有司往申舊典今遣某官
某乙持節冊爾爲雅王於戲受冊之命重屬汝躬列聖在
天百辟在位在天必聽在位必觀罔怠交修用承多祐

冊瓊王祥文

維年月日皇帝若曰不廢懿親大封同姓吾嘗觀於經籍
矣然而歷代賢君正名用典必擇才行使之光昭其可以
子弟之私恩冒先王之成憲朕雖不德必慎有爲咨爾第
十二男祥於兒戲之間多幼敏之習謂之材也不曰近乎
處昆弟之間有推讓之性言其行也不曰類乎是宜疏封
且命申誥今遣某官某乙持節冊爾爲瓊王噫作德日休
爾則逸作僞日拙爾則勞擇利而行令名斯至

冊淑妃爲皇后文

維乾元五年歲次戊午四月庚子朔二十七日丙寅皇帝

若曰惟王法天惟后象地統理之道相須而成秉陽雖繫於昭垂養物必資於厚載處大倫而克正與元化而同光上贊君臨旁資婦道遠徵百代成本六經而禮曠累朝位虛中壺嚴裡怵惕玉齋無所進之人內令寂寥彤管有不書之史興廢之重作配實難咨爾淑妃何氏柔既可觀儉皆中度外言罔入懿則自成處閑房而椒亦蜚聲御衆妾而木能逮下洎邦家多難輔佐克勤每見求衣未嘗安寢先知盱食不視晨羞欲齊京室之賢罔慕長秋之盛勞謙之報降福是宜乃顧皇儲仍因子貴公卿來講龜筮斯從

實上帝之所嘉詎朕心之可抑今遣某官某持節冊爾爲
皇后於戲極位正名居尊齊體典一申而百神聽禮一行
而萬國歡恐懼可以保其名齊莊可以守其位往司陰教
以永天休

欽定全唐文卷八百三十四目錄

錢珣

四

爲宰相賀雨表

史館王相公進和詩表

宰相諫罷討伐請不幸奉天表

爲集賢崔相公論京兆除授表

中書省請冊皇后表

史館王相公請冊淑妃何氏爲皇后表

熒惑退舍宰相請復常膳表

爲宗正卿請復常膳表

代王相公謝加門下侍郎食邑表

代崔相公謝加中書侍郎食邑表

代史館王相公謝加食邑實封表

代中書孫相公謝登庸表

代陸相公謝再入表

代史館王相公謝監修國史鹽鐵使表

欽定全唐文卷八百三十四

錢珣四

爲宰相賀雨表

臣某等今月某日京兆府奏降雨分寸者伏以頃屬時雨
稍憇聖慮憂軫尋舉祀典用禱元功臣聞廣覆無親明德
是輔誠之所動天則不高仲春以來驕陽頗熾宵旰勞念
生靈具知部樂空縣常羞盡減遽陳牲玉並走山川况便
殿坐朝深形憂色不責輔臣之咎恐貽赤子之心橐籥之
間神祇咸聽既有聲聞之實寧無昭報之期是以鑿鑿忽

興蜿蜒遂作固得遠踰關輔匪獨周布郊圻君必動天歲
有成於登麥臣雖充位力不足於爲霖空喜滂沱敢言燮
理甫田皆潤沴氣全消信可待於豐穰更何求於符瑞臣
等無任賀聖欣躍抃舞之至

史館王相公進和詩表

臣某言臣聞在心爲志發言爲詩志通而若啟源流詩作
而自合律呂伏惟陛下道惟恭默稟在文思永圖欲漸於
無爲睿覽且明於多暇因臨丹壑遂躡金繩喜物象之澄
清假詠歌而放曠聲傳天籟韻合霜鐘篇殊黃竹之名辭

掩白雲之美臣等逢時竊位敢並韋平應詔屬詞文非顏
謝徒偶昭融之運獲聞雅正之音傾聽不知愧延陵之季
子試吹必濫比南郭之先生但思參列輔臣安敢首違聖
旨輒同擊壤仰和貫珠誠懷鄭衛之慚但感宮商之說星
辰自轉難參旭日之光鼙鼓空鳴莫續春雷之響其奉和
御製五言七言詩二首謹錄進上塵黷聖鑒臣無任循省
惶越之至

宰相諫罷討伐請不幸奉天表

臣某等言伏以伐叛興戎國之大事有不得已然後行之

而食在兵先兵居謀後餽餉必足經畧無遺得必勝之帥
臣有可用之勁卒然後更度利害熟計始終以是興戎乃
可伐叛昨者陛下以某臣節有虧嘗犯天怒而易其鎮守
猶示渥恩遷延未行包藏難測聖慮潛察睿斷勇爲爰命
宰臣使奉成算臣等雖承嚴旨敢不深思實乃國用方虛
軍糧難濟藩垣調發深恐依違兼量於足食足兵二者皆
所未備況去秋寇孽犯順鑾輅出居宗廟震驚士庶流落
尚賴皇威所被大熟尋平宮闕復清生靈全活今纔周歲
始得稍安至於畿甸之間尚有瘡痍之疾臣等所以累因

敷奏具寫便宜且乞明聖更詳事理緩謀周慮全體養威
必使盡叶事機而後重行討伐愚誠無惑睿志不移旬月
之間血誠備瀝事行已定不敢復言昨者仰奉天顏密承
聖旨又欲出幸近縣親督戎師仍慮寇盜奔衝且貴城壘
堅固特令臣等更共平章祇稟宸嚴敢不傾竭蓋陛下將
恐姦克遽至奔軼遂欲先居高壘免動驚塵備審睿懷切
在於此又以爲出臨戎事促詔藩臣督集卒徒以速誅翦
言於常理固合所宜然臣披抉腹心陳其數事一則伏思
朝廷今日之事與建中之難不同當時猛將如雲謀臣如

雨國贍九年之蓄兵持百勝之權德宗皇帝出幸奉天以
爲長策一旦懷光繼叛晷刻難安遽遠宗祧遂奔梁漢陛
下視將帥之材與粟帛之積得如當時否天下盡忠之力
赴難之心又得如當時否以此度量實恐稍難二則陛下
雖處奉天之固不可遽棄京師勿使姦謀馳於間道直趨
闕下大縱凶殘陛下隔在孤城衆軍各圖其利謀危救亂
欲何人三則士庶疑懼之心尚賴宸極安止若使鑾鈴
順動禁掖頓空則萬姓之心一時何仰況輕違廟社遽捨
生靈自古帝王未嘗至此四則秋序肅殺之氣金在西方

昨者冒此用兵犯陰陽大忌今陛下以一朝之怒忽萬乘之尊遠出皇居又衝王氣忝爲臣子復列宰衡苟不盡言是負聖德五則凡有天象之變所以儆動帝王昨者妖星頗多凌犯陛下深知戒懼且降德音兼有禳祈欲銷災咎而銷災之本全在清靜無爲今則伐叛用兵天心不易又欲當災星謫見之後衝王氣以征行訪於匹夫亦知不可惟此五事敢不具言今則實賴陛下英朗疏通且思守位以陛下語臣二者之意評愚臣五事之言裁在宸衷以安大事去此就彼聖慮自深輒貢直言難逃罪戾臣某等無

任惶越懇激之至

爲集賢崔相公論京兆除授表

臣某言今月某日伏奉密詔具審聖旨欲以某官鄭浦除京兆尹令臣進擬來者出自宸衷敢言違詔事非允當今具奏聞伏以三輔之雄京兆居首王畿之理專制甚難厯代重官當今急務比者任用多是丞郎給舍有才之人或藩方善政之師宣宗皇帝求理之切常輟翰林學士韋澳授以此官今陛下固合且命中書令其公選苟或未稱即可改張鄭某自守疑周行頗聞靜守當官莅職亦極恪勤

量材則可以序遷進善則無妨獎勸至於關中戶口本貫
京師轂下威權莫先尹正畿甸之內諸鎮甚多都城之間
萬戶來會責辦則供須極衆整肅則彈壓且殷鄭浦入仕
之初曾爲鹽州軍事判官幸守章程粗成勞績因茲際會
遂列朝班物望固輕揚歷未久倘以此官除授必當不叶
羣情向者嗣薛王知柔以宗室大臣久兼崇秩事功已著
總領方宜以浦代之恐失所稱浦旣乏公望又匪異材遽
達宸聰必因薦導失舉之誤所繫匪輕臣知柔出藩便憂
京兆之任蓋二十四縣無不彫殘況屬今秋又罹兵火鄉

間刦殺尚且未安軍鎮侵陵比常多事賦輸之際撫輯尤難頃自黃巢犯闕災患相繼京畿百姓傷死固多今所保全皆由自備凡爲兵器無不家藏寇至即設寨依山事已則還鄉力穡可耕可戰自是精兵今近鎮多強不爲無事徵召外藩騎卒朝廷又乏軍糧昨者猖狂兼爲患禍每宜警戒不可遠忘實任京兆之權兼須武畧不惟便於政理亦要防於艱虞臣請便言冀合睿算竊見某官李鉉兩朝宿將久立茂勳頗以威名彰於委寄衆情甚洽公論多推授以尹京必能通濟京畿制置兼以命之有權則可抑豪

強用武則可清奸盜圖安之本全在京都備患之先無加
軍旅鋌之才畧得以總臨畿內戶人累經賊寇農收之暇
訓練不難鄉閭自強侵擾固息無事則各營耕稼有慮則
便執干戈不假饋糧又非失業旣安必集就便不煩況目
下京都未能安堵速須制置安得因循非李鋌不可委任
事惟重難尋己參詳外度人情內思機便悉宜如此方敢
陳論伏乞聖明靜賜睿覽以京尹難理任事思當今奸弊
之初用非材無望之人何以控制於此若他時不濟何以
謀安雖欲用典罪之固亦無救於患且李鋌與臣無素分

鄭浦與臣無宿嫌與奪之間公當而已切於此事尋欲兼
候奏聞便屬忽患瘡痍不離枕席近雖潰穴尚有本根固
極虛羸且須將理寢食敢忘於機務敷陳又隔於天顏遂
敢直奉牋毫粗達肝膈伏以反正之新調理仍急有犯無
隱臣心合罄於此時從善如流聖政宜先於大者甚難甚
切不敢不論伏以睿斷精明臣等常切感仰今茲論列實
冀允從倘或未察愚衷臣實不敢奉詔干冒宸宸臣某無
任惶恐迫切之至

中書省請冊皇后表

臣某等言伏聞禮云男正位乎外女正位乎內乃欲承天
休正人紀事宗廟奉烝嘗是以詩有關雎冠三百篇之首
用以佐天下而正夫婦乃政之所由興也伏以聖唐積仁
累德列聖重光莫不師古以訓人宏禮以敦本遂得九垓
從化萬國用康曩者彝倫稍憊王道微缺使龍樓曠主鬯
之位翟衣闕助祭之規則外和而國安內和而家理安得
而致也必將有以待之伏惟陛下續列聖之洪業恢百王
之令圖爰建東宮再振墜典凡居寰海莫不忭歡百辟庶
臣所懷尚慊蓋以中壺之位未立六宮之政未崇臣案天

極四星一爲正如上天垂象不可虛其應伏聞淑妃某氏以坤厚之性母範有融淑懿之姿光乎內理用能誕生哲嗣克當天心竊願陛下思敬大猷仰宏丕訓淑妃某氏特依故事冊爲皇后使六宮之內一以遵承所爲王政之所由興而風化天下臣等位叨近密職在絲綸朝廷舊章合有論請上期聖造特賜允從輕冒宸嚴無任恐戰之至

史館王相公請冊淑妃何氏爲皇后表

臣某言臣聞乾坤相配所以全覆載之功日月相隨所以明照臨之道惟王建后惟后助王若乾坤相配以成功若

日月相隨而行道古皇有制歷代皆然伏惟皇帝陛下法
天作聖引古爲師興邦則啟於聰明爲禮必循於先哲然
而中宮久曠陰教罔修伏自累朝遂同廢典四海絕仰觀
之表九嬪無所統之尊誰詠國風空垂易象永惟委墜可
謂因循漢氏以來舊章不易常先立后始可建儲今元良
已視於東朝而柔順未臨於內職旣虛正位莫敘大倫臣
等每奉清光累陳彝憲竊詳睿旨俯鑒愚衷請問守龜必
當告吉掖庭累行詎無白鷺之徵簡策正名宜受金螭之
錫是以敢干旒宸進拜封章伏乞申命有司擇定良日俾

行盛禮自叶至公冒黷宸衷臣等無任懇迫惶恐之至

熒惑退舍宰相請復常膳表

臣某等言今月某日伏奉批詔以臣累陳列宿之間熒惑退舍所宜升臨正殿進復常羞而睿聽彌高羣誠莫遂顧台星之有位居公府以不遑伏惟陛下道合秉陽事皆師古稟天明於垂象察時變以側身克示允恭未忘戒懼考乎經籍實契規模雖退就卑宮儉惟降食方期應感合舉典彝然而芒角旣收運行已順厯懇亦循於故實拜章敢惑於聰明而元鑒未開丹心如燭鋪陳無序裨贊失圖伏

以大配乾坤重承宗廟執禮必遺於小者推誠皆可以貫之則行正道以臨萬邦不在乎不居法座也布王澤而滋庶物不在乎不食重味也而陛下未嘗不行正道於遐邇布王澤於細微苟行之有終宏之不已則天惟輔德心實弭災視棟宇而自安御豆籩而自爽敢祈聖鑒必念斯言伏惟俯徇愚誠特允所奏干冒旒宸臣無任

爲宗正卿請復常膳表

臣某等言今月某日伏奉批詔以臣所請復常膳御正殿未賜允許者臣等恭承詔旨竊仰聖謀以爲前史所垂正

言可取則應天動人之事實哲王致理之先然臣伏思陛下繼體以來推誠必至友愛之道顯教萬方惻隱之心罔遺一物於王師致討司寇用刑率皆毒被蒸人罪與衆怒救殘虐之極弊懲悖亂之元兇而後効順立功報之爵祿勞心焦思痛在瘡痍屢降德音勤行王道得非應天以實而動人以行哉況謫見之後戒懼不遑朝野所知星辰所照則大官進御路寢燕居既舉舊章將踰期月固可以特開睿鑒俯徇羣心理且叶於至公事兼存於大體臣某等謬居宗緒敢貢飾詞盡布腹心復干宸宸無任仰望兢越

屏營之至

代王相公謝加門下侍郎食邑表

臣某言昨蒙恩命授臣某官等者今月日已奉表陳讓跪承批詔未賜允從方就日以傾心若履冰而舉足臣某中謝臣立朝守嗣莫繼前修學古入官敢期高位伏遇尊號皇帝陛下道惟樂育志在紹聞待河清而先靜化源致俗阜而深探理窟當乙夜縱觀之後啟輔臣夢得之休而遽以平衡授茲弱質頗乖庶政莫達大經何施作相之才但累知臣之鑒厭兵而五兵尚在唯恐人殘析穀而百穀未

升仍憂歲旱尋宜待罪已合避賢陛下慎以退人容於竊
位兼迴睿睠遽正台階進當浴鳳之榮更懼維鵜之刺況
增封建俾重弼諧臣且自量則爲不稱是以陳辭慙懇冀
動天心拜章而方謂可安捧詔而未嘗得請尚希終收渥
澤遂寢典彝苟責實而有聞信假寵之非晚徇之公道寤
主所圖受爵旣多懼君恩之大盛省躬甚拙知官謗之必
興負戴聖慈臣某無任感激兢悸之至

代崔相公謝加中書侍郎食邑表

臣某言伏奉今月某日制書授臣中書侍郎仍進封開國

子加食邑二百戶者寵踰素分憂集微躬臣某中謝臣聞
當可舉而後行則龔倫敘見有功而後進則勞臣勸如或
行不當舉進不見功是謂謬恩實維虛授臣學非練達質
異溫良致身而敢望坐茵措手而寧期補袞嘗塵侍從且
昧論思既無酒誥之能莫並食時之敏忽蒙聖造遽委化
權佐運行而不應中台論燮理而未周四序何言睿澤曲
被微臣纔叨正秩之榮兼進疏封之命戴恩無力臨事知
非將投盈篋之書寧用濟川之楫願迴元鑒俯徇愚衷致
公器之無私在國章而克重光昭聖德獲戒貪夫仰望皇

私臣某無任懇悃激切兢悸之至

代史館王相公謝加食邑實封表

臣某言伏奉今月某日恩制加臣食邑實封若干者充位
代天無名益地祇膺茂寵併集百憂中謝臣聞賞以昭其
功典以載其事是爲重柄用合大經苟功不足昭事非可
載濫承休命實累皇猷臣謬執化權無裨衮職徒見容於
君父每受責於神靈頃者陛下薄狩近藩復興否運寬仁
屈已神武去邪敢有惑於羣謀實無渝於睿斷寰區之內
耳目同驚此非臣齷齪之心所能匡贊重圖反國艱若設

都仗戎帥以經營寄輔臣而鎮撫秦人載聚周廟克成千
門既啟於建章萬騎仍隨於司隸宸居復正懸法更高又
非蒙昧之才所能施展荷景貺而寧參天力奉清光而徒
和山呼無補艱難方懷慚懼詎謂聖慈忽被異數仍加賞
優而欲舉何功典重而將言何事況乎真食尤曰寵榮輕
行於富庶之秋皆期必稱尚屬於艱難之日焉可非宜伏
冀聖慈必收殊渥臣某無任仰望逼切懇悃屏營之至

代中書孫相公謝登庸表

臣偃言伏奉今月某日制命授臣中書侍郎同中書門下

平章事者渥澤自天怔忡無地臣某中謝臣聞佐天子理
陰陽撫四夷遂萬物者宰相之職也然而能經國則可以
佐天子達化源即可以理陰陽善柔服可以撫四夷適方
圓可以遂萬物今臣才非經國智昧化源不知柔服之謀
未達方圓之道使之執政必致曠官伏惟皇帝陛下與天
同覆與日合明有言必訪於蒞蕘有用必搜於林藪今者
初當出狩且欲興戎修至德以弭災動神機以伐叛復亨
否運昭告元穹是宜慎擇賢良光輔睿哲臣志雖懋學器
異混成但爲章句之徒莫應權衡之任陛下明恩委照聖

鑒洞開拔於駁正之司置在仰成之地越諸彝典授以洪鈞空驚行潦之流忽載大川之楫遭逢獨異寢寐終疑願迴非次之榮且降可行之命立朝在野必有其人省已捫心莫知所措臣某無任感恩荷聖兢懼屏營之至

代陸相公謝再入表

臣宸言臣昨蒙恩制除授中書侍郎同中書門下平章事今日面宣聖旨不令更有陳讓者臣聞虞舜成湯之爲君也舉臯陶伊尹之賢處補衮宰衡之任不仁自遠大道甚夷上可致君下可遂物相須之用古策具書獲被寵靈再

當變理仰成之重內省至難披肝膈之所藏冀封章之可
達煩言無取睿睎莫迴親奉清光復傾丹懇讓不容於稽
首進何務以沃心臣誠憂誠感頓首頓首伏惟尊號皇帝
陛下濬哲守文高明立極廣好問則裕之美推任賢勿貳
之誠思舉直以化人待封比屋念偃兵而屈己欲拜昌言
是宜慎擇濟川博求在野並稷契之稱前代若姚宋之贊
本朝使竭謨猷以光輔弼臣器殊王佐質謝卿才常念立
身但希承嗣未曉必聞之政合居不急之官雖臨事秉心
如秤敢欺於輕重而自天率性佩弦亦戒於因循頃者徒

幸遭逢且乖斟酌旣塵公餽果驗素殮旋叨就列之榮每
荷匿瑕之道今日忽流霈澤又執洪鈞信夢寢之難期詎
著龜之可卜頃雖當軸竊類代庖是非誠畏於人言去就
敢違於君命中台不耀先慙箕斗之光元首自明何效股
肱之力銜恩匪稱揣分彌憂詞不盡於抽毫淚空知於承
睫負戴聖造辭莫能殫臣某無任感激榮抃屏營之至謹
言

代史館王相公謝監修國史鹽鐵使表

臣博言伏奉今月某日制書加授臣門下侍郎監修國史

充諸道轉運鹽鐵等使者進當辨色動乏書思寵光忽降
於昭回循揣空知於殞越中謝臣聞可衛社稷謂之大臣
有利國家是爲公輔大臣所以能經濟公輔所以竭訏謨
倘昧於斯則同備位臣爲儒孤陋守嗣凌遲旣無稽古之
勤止望易農之仕安敢苟求進達濫冒名聲但任顓愚獲
逢濬哲聯叨服冕遽至秉鈞而莫貢昌言多隳庶績復致
省方之難皆由失職之愆且合自拘敢期策免陛下克固
知臣之鑒每推責己之誠雖罷變調猶當節制捧彤弓而
欲去尚抱憂心指金鉉以復畱終迴宸睠輔相之委近代

所無不才何補於股肱有感徒深於骨髓伏遇陛下勃興
景祚丕變公朝掃蔽日之浮雲納投水之堅石應機之急
當宁不違從諫之明轉圜未速仰觀奮發實在斯須聖政
惟新墜章咸舉宜求耆碩共致承平今臣曲被睿慈仍加
霈澤黃樞正秩青史專修兼司運漕之權俾集牢籠之利
屏躬承命俛首退思固合避賢惟憂致寇保其終始賜以
安全陛下且許乞骸不令覆餗徇公爲理擇善任人幸非
伯石之情敢待召平之說且移盛寵別授通材顧叶澄清
仍資庶富而近臣遽降聖旨重臨難陳固讓之辭唯勵恪

居之志雖多言可畏垂黜纘而有所不聞而內省堪憂補
元袞而何能自効臣某無任荷恩榮耀兢戴怔忡之至